



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo

**GRADSKO VIJEĆE**

## *REZOLUCIJA*

*Sarajevo, februar 2022. godine*

---

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 216 659  
**Fax:** +387 33 205 874  
**Email:** [gsgv@sarajevo.ba](mailto:gsgv@sarajevo.ba)  
**Web:** [gradskovijece.sarajevo.ba](http://gradskovijece.sarajevo.ba)



U izazovnim vremenima za Bosnu i Hercegovinu, region Balkana, istočnu Evropu i brojne druge krajeve u svijetu koji imaju naglašenu potrebu za mirom, sigurnošću i napretkom, umjesto težnji koje točak historije vuku unazad, čemu svjedočimo u posljednje vrijeme. Pri ponovo izraženim tendencijama nejednakosti i prijetnje silom, Sarajevo želi ponoviti svoju čvrstu opredijeljenost za mir, za uvažavanje vrijednosti sadržanih u Povelji OUN, za principe na kojim se temelje sigurnost i saradnja u Evropi, za poštivanje ljudskih prava, demokratije i pravne države u skladu sa Evropskom konvencijom o pravima čovjeka i fundamentalnim slobodama. Odlučno je razvijati svestrane veze sa prijateljskim gradovima, regijama i zemljama, naglašavajući značaj otvorenosti i pluralnih vrijednosti koje su u temeljima grada Sarajeva.

Sarajevo je simbol stradanja i u isto vrijeme simbol nesalomivog otpora, koje je izdržao brutalnu i najdužu opsadu u historiji čovječanstva u trajanju od 1425 dana, u periodu od 1992. do 1995. godine. Njegovi građani, znajući vrijednost mira i dosljedno čuvajući njegove tekovine, bore se za slobode, ljudska prava i zajednički život. Sa dobrodošlicom primaju one koji ga pohode kao simbol mira. U osvjetljavanje 30. godišnjice od početka opsade grada Sarajeva – 5. aprila, Sarajevo smatra svojom obavezom da digne glas protiv sve više retrogradnih i profašističkih ideja i njihovih protagonista.

Rat kao izraz bezumlja plaćaju nevini ljudi svojim životima. Sa tugom i dubokim pijetetom odajemo počast nevinim žrtvama Sarajeva, našim sugrađanima, kojih je 11.541 izgubilo živote tokom opsade. Najbolnija spoznaja je da je među njima bilo i 1.601 dijete. Grad Sarajevo je u tom periodu žestoko razaran artiljerijom i drugim vojnim sredstvima, rušene su gradske četvrti, mahale, ulice, trgovi, svi važniji i manje važni objekti, stambene zgrade, privatne kuće, među kojima zgrada porodilišta – Jezero, Vijećnica u kojoj je izgorjelo blizu dva miliona knjiga, centralna Pošta, Olimpijski muzej, Olimpijska dvorana Zetra, zgrada lista „Oslobođenje“, brojne fabrike, škole, ustanove kulture, zdravstva i druge. Sarajevo je postao razoren grad sa velikim brojem ranjenih i osakaćenih ljudi. Građanima, bolnicama i svim drugim ustanovama uskraćeni su dotok vode, struje, plina i drugih energenata, a ljudi su bili izloženi gladi, smrzavanju i bolesti. Sve su to činjenice koje se ne smiju zaboraviti niti relativizirati njihove posljedice. Sarajevo je i grad koji je ostao bez skoro polovine predratnog stanovništva, od kojih većina sada živi u evropskim državama, SAD, Australiji, Kanadi i drugdje, održavajući veze sa svojom domovinom i gradom kojeg podržavaju. Brojne su i druge posljedice rata, od ekonomskih, socijalnih, kulturoloških, do nacionalnih, vjerskih i običajnih. Zato Sarajevo ima historijsku, moralnu i svaku drugu obavezu da na pokušaje ugrožavanja mira, pred kućnim pragom ili drugdje, u bližem ili daljem susjedstvu, visoko podigne svoj glas, upozori na sve opasnosti ratnog konflikta, kobne posljedice po nevine ljude i sve druge strahote koje donosi rat.

Sarajevo je iz ruševina i pepela vratilo savremeni izgled glavnog grada Bosne i Hercegovine. Obnovljen je vrijednim radom njegovih građana, zahvaljujući velikoj pomoći međunarodne zajednice i prijatelja grada Sarajeva. Nastavlja svoju obnovu, vida još otvorene ratne rane, prolazi kroz složen period u kojem se osjećaju posljedice političke nestabilnosti u zemlji, ekonomske recesije, odlaska radno sposobnog stanovništva, sve u drugačijim međunarodnim okolnostima, što bitno utiče i na brzinu realizacije ukupne obnove. Ipak, nove generacije mladih, obrazovanih i odlučnih ljudi, kao i drugi koji su prihvatili Sarajevo kao svoj grad unoseći vlastiti potencijal, energiju i spremnost da doprinesu njegovom prosperitetu, na temeljima koje su stvorile prethodne generacije, daju mu obilježje modernog grada koji s ponosom baštini bogatu tradiciju kultura, duhovne nadgradnje, materijalnog i nematerijalnog stvaralaštva oblikovanog kroz vjekove postojanja.

Znajući sa koliko se odricanja, napora i pomoći obnavljao grad u posljednjih 25 godina, koji još nije dostigao željeni stepen razvoja, te kako je mukotrpno stvarati nove vrijednosti i sa koliko neizvjesnosti se valja suočiti radi budućeg boljeg života građana i prosperiteta grada Sarajeva. Gradsko vijeće ističe da su preduslov za svaki napredak: mir, sigurno okruženje i poštivanje prava čovjeka. U otklanjanju posljedica rata i brojnih teškoća u tom procesu, sigurnost je bila i ostaje mnogo više od nepostojanja oružanog sukoba, jer to treba biti stanje u kojem ne postoji nikakva opasnost ili prijetnja, u kojem su ostvareni uslovi za slobodan protok ljudi, razmjenu ideja, kapitala, tehnoloških,

naučnih i drugih dostignuća, gdje vlada pozitivna atmosfera za zajedničke poslove i druge djelatnosti koje donose dobro ljudima i gradu kao cjelini. Sarajevo je prošlo iskušenja i zna da je za izgradnju novih vrijednosti potrebno mnogo vremena i sredstava, kojih je inače sve manje, a svjedočilo je da agresija u kratkom periodu u prah i pepeo pretvara decenijske napore izgradnje i odnosi velike ljudske žrtve. Zato građani Sarajeva energično upozoravaju da nitko nema pravo da dovodi u pitanje njihovu sigurnost i grada kao cjeline, bez obzira na okolnosti, političke razlike u pogledima ili suprotstavljene interese. Sigurnost za državu i njene građane je istovremeno i jedan od najvažnijih zadataka lokalnih sredina u Bosni i Hercegovini.

**Imajući u vidu navedeno, u nastojanju da doprinese smirivanju prilika u zemlji, odgovori na izazove vremena i da uputi poruke mira, Gradsko vijeće, u skladu sa članom 26. stav 1. tačka 2. Statuta Grada Sarajeva („Službene novine Kantona Sarajevo, broj 34/08 – prečišćeni tekst), na 12. sjednici održanoj dana 23.02.2022. godine, donijelo je**

## **R E Z O L U C I J U**

- Gradsko vijeće ističe da je za svaki napredak potreban mir, sigurno okruženje, poštivanje ljudskih prava i fundamentalnih sloboda, naročito u aktualnim okolnostima u Bosni i Hercegovini radi ponovo naraslih napetosti, jednostranih odluka pojedinih nivoa vlasti i njihovih aktivnosti usmjerenih ka podriivanju ustavnog i pravnog ustrojstva u državi.
- Grad Sarajevo se zalaže da se svim sredstvima djeluje u cilju prevencije sukoba. Sa tragičnim iskustvima iz prethodnog rata i svjestan kakve poražavajuće posljedice ostavljaju agresija i ratni sukobi, poziva sve političke aktere u našoj zemlji, kao i na drugim kriznim tačkama u svijetu, da kroz izgradnju međusobnog povjerenja, jačanju dijaloga i kontinuitet u razgovorima traže moguća rješenja, prvenstveno oslonjena na najbolje vrijednosti razvijenih evropskih demokratija. Spreman je staviti na raspolaganje ljudske i druge kapacitete kojim raspolaže u ostvarenju ovog uzvišenog cilja.
- Sarajevo je od uvijek bilo otvoren grad gdje su se sretali Istok i Zapad, u kojem su se dogodili neki od sudbonosnih događaja koji su obilježili historiju, drugi koji su pokazali zvjezdane trenutke ovog grada, njegovu toleranciju kao pluralni izraz sredine i dobronamjernosti Sarajlija. Poštivanje drugog i drugačijeg je sastavni dio bića Sarajeva. Takvim želi ostati i ubuduće. Zato Gradsko vijeće poziva sve odgovorne domaće aktere da politički i svaki drugi dijalog vode u Sarajevu kao glavnom gradu Bosne i Hercegovine. Istovremeno, otvoreno je za pružanje dobrih usluga međunarodnim akterima da vode pregovore o spornim pitanjima drugih država u Sarajevu, u duhu poštivanja drugog i drugačijeg, za pravična i dugoročna mirovna rješenja u tim sredinama.
- Grad Sarajevo se zalaže za uspostavljanje pune stabilnosti u regionu, poštivanje suvereniteta, nezavisnosti i teritorijalnog integriteta svih država, razvijanje dobrosusjedskih i prijateljskih odnosa, ubrzano rješavanje još otvorenih bilateralnih pitanja između država nastalih raspadom SFR Jugoslavije, snažnije unaprjeđenje ekonomske i druge saradnje, saradnju i međusobnu podršku na putu ka evropskim integracijama, jačanje saradnje gradova i drugo, sve u cilju utemeljenja stabilnosti kao trajnog opredjeljenja u regionu. Zato stabilnost ostaje preduslov i ključ za razvoj i prosperitet svake pojedinačne zemlje i regiona kao cjeline. Sarajevo će svojim aktivnostima doprinositi jačanju stabilnosti u Bosni i Hercegovini, u regionu i šire kroz širenje veza sa prijateljskim gradovima, potičući dijalog o otvorenim pitanjima, jačajući povjerenje

među ljudima iz različitih sredina, angažujući se u jačanju kulturne, naučne, obrazovne, sportske i druge saradnje koja povezuje ljude u zemlji i regionu. Ostaje otvoren i kosmopolitski grad, spreman da podrži slične inicijative drugih gradova u cilju stabilnosti kao trajnog stanja i zajedničke budućnosti.

- Grad Sarajevo ocjenjuje važnim stalnu komunikaciju sa međunarodnim partnerima. Zahvalan je na pruženoj pomoći prijateljskih gradova, regija, država i međunarodnih organizacija u poslijeratnoj obnovi, izgradnji i naglašava daljnju podršku međunarodne zajednice u nastojanju Sarajeva da dostigne nivo najrazvijenijih sredina u Evropi. Grad Sarajevo smatra važnim prisustvo međunarodnih institucija u Bosni i Hercegovini, diplomatskih i drugih misija brojnih država i organizacija, inostranih privrednih, univerzitetskih, obrazovnih, kulturnih i drugih subjekata koje Sarajevu i Bosni i Hercegovini daju konstruktivan doprinos u naporima izgradnje mira, stabilnosti, jačanja otvorenosti i povezanosti sa svijetom.
- Gradsko vijeće, gradonačelnica i građani Sarajeva izražavaju odlučnost da u demokratskim procesima, kroz jačanje dijaloga, uz uvažavanje postojećeg ustavnog i pravnog sistema, bez opstrukcija i ucjena, doprinose pozitivnim promjenama u Bosni i Hercegovini. Istovremeno, naglašavaju odlučnost da se suprotstave svakom nasilnom ili neustavnom postupanju koje želi nametnuti druga rješenja. Sarajevo je u nedavnoj prošlosti platilo najvišu cijenu uskim i jednostranim interesima, nedobronamjnim politikama, ucjenama i upotrebi sile, što neće dozvoliti da se ponovi. To je obaveza koju će poštivati i svaka buduća vlast u gradu Sarajevu.
- Mir nema alternative i zato moramo učiniti sve da bude sačuvan kao trajna kategorija u Bosni i Hercegovini, regionu, Evropi i drugdje.

*PREDSJEDAVALJUĆI GRADSKOG VIJEĆA*

*Jasmin Ademović, s.r.*

Broj: 01-GV-02-329/22  
Sarajevo, 23.02.2022. godine